

Bil. 35

Selasa

15 Oktober 2019



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGAL KEDUA
MESYUARAT KETIGA**

KANDUNGAN

UCAPAN DI BAWAH USUL BERKENAAN PERKARA TADBIR KERAJAAN [P.M.17]:

- **Status Balai Polis Bandar Country Homes, Rawang,
Selangor Darul Ehsan**
- *YB. Tuan William Leong Jee Keen (Selayang)* [Halaman 1]
- **Peruntukan RM20 juta untuk Projek Pembinaan dan
Pemindahan 10+6 SJKC**
- *YB. Datuk Seri Ir. Dr. Wee Ka Siong (Ayer Hitam)* [Halaman 3]

**MALAYSIA
KAMAR KHAS
PARLIMEN KEEMPAT BELAS
PENGKAL KEDUA
MESYUARAT KETIGA**

Selasa, 15 Oktober 2019

Mesyuarat dimulakan pada pukul 2.30 petang

DOA

*[Timbalan Yang di-Pertua (Dato' Mohd Rashid Hasnon)
mempengerusikan Mesyuarat]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

**Status Balai Polis Bandar Country Homes, Rawang,
Selangor Darul Ehsan**

2.34 ptg.

Tuan William Leong Jee Keen [Selayang]: Terima kasih Tuan Yang di-Pertua. Sistem birokrasi dan pentadbiran negara seharusnya memainkan peranan sebagai pemudah cara dalam penyampaian perkhidmatan awam. Namun begitu, pada kebanyakan masa, ia bukan sahaja tidak membantu malah merumitkan keadaan sehingga kebaikan dan dikorbankan.

Pada 28 Mei 2019, pihak saya telah menulis surat kepada Kementerian Dalam Negeri bagi mendapatkan status Balai Polis Bandar Country Homes, Rawang. Balai Polis telah siap dibina pada tahun 2017. Pihak kontraktor telah menyerahkan kepada Kementerian Dalam Negeri pada Januari 2018. Manakala pihak Kementerian Dalam Negeri telah menyerahkannya kepada pihak PDRM pada April 2018.

Walau bagaimanapun, sehingga kini balai polis tersebut masih bertaraf balai komuniti. Ekoran daripada itu, bilangan anggota yang bertugas juga tidak mencukupi iaitu hanya seramai 10 orang sahaja. Ini menimbulkan masalah keselamatan kepada penduduk Bandar Country Homes dan sekitar yang kini mencecah bilangan seramai 200,000 orang.

Kini, nisbah bilangan polis kepada penduduk Rawang adalah 1:4,000 orang, sedangkan kadar yang ideal ialah 1:250. Jika taraf balai polis Bandar Country Homes ini dinaikkan kepada balai polis sepenuhnya, bilangan anggota polis bertugas bolehlah dinaikkan sehingga seramai 40 kepada 60 orang anggota.

Saya memohon kerjasama dan pertimbangan yang sepenuhnya dari pihak kementerian agar taraf atau gred Balai Polis Bandar Country Homes, Rawang ini dinaikkan agar masalah keselamatan ekoran dari kekurangan anggota polis yang bertugas akan dapat diatasi. Saya juga meminta Yang Berhormat Menteri memberikan penjelasan dan jawapan bila Balai Polis Bandar Country Homes akan dinaiktarafkan dengan jumlah anggota yang dinanti-nantikan. Sekian, terima kasih.

2.36 ptg.

Timbalan Menteri Dalam Negeri [Datuk Mohd Azis bin Jamman]: Terima kasih Tuan Yang di-Pertua dan terima kasih sahabat saya, Yang Berhormat Selayang.

Tuan Yang di-Pertua, Balai Polis Komuniti Country Heights, Rawang adalah terletak di bawah seliaan dan kawasan pentadbiran Balai Polis Rawang yang mempunyai 11 perjawatan sedia ada. Perwujudan balai polis komuniti ini adalah bertujuan mewujudkan persekitaran selamat dan menjamin kesejahteraan penduduk terutama di kawasan tersebut, khususnya selain dari melaksanakan *community policing* dan *engagement* bersama penduduk setempat. Lokasi balai polis ini terletak lebih kurang 9 kilometer dari Balai Polis Rawang.

Untuk makluman Yang Berhormat juga, Balai Polis Komuniti Country Homes ini telah dibina dan disumbangkan oleh pemaju perumahan tersebut dan bukannya peruntukan kerajaan. Maknanya atas ihsan kontraktor perumahan itu, kontraktor telah membina balai polis ini dan memberikannya kepada Kementerian Dalam Negeri untuk diguna pakai oleh Polis Diraja Malaysia.

Pada masa ini, Kementerian Dalam Negeri melalui Polis Diraja Malaysia sedang menjalankan kajian penilaian untuk menaik taraf Balai Polis Komuniti Country Homes kepada balai polis berdasarkan kepada kewajaran dan keperluan semasa seperti berikut:

- (i) peningkatan kadar jenayah;
- (ii) pertambahan populasi penduduk;
- (iii) perwujudan bandar-bandar baru;
- (iv) pertumbuhan dan peningkatan ekonomi; dan
- (v) peningkatan aktiviti-aktiviti di dalam sektor pendidikan.

Hasil kajian yang dijalankan oleh kementerian mendapati Balai Polis Komuniti Country Homes akan dijenamakan semula dan dinaiktarafkan kepada status balai polis. Ini saya harap Yang Berhormat Selayang senang hatilah. Walau bagaimanapun, kajian terhadap perjawatan bagi menetapkan kategori balai tersebut bergantung pada peruntukan dan kelulusan bagi perjawatan yang ideal selaras dengan dasar kerajaan untuk penjimatan dalam perbelanjaan

mengurus semasa.

Sebagai makluman, pengukuhan perjawatan hanya diutamakan ke atas 471 balai-balai polis yang mempunyai bilangan perjawatan kurang daripada 15 termasuklah ke atas Balai Polis Rawang. Sekian, terima kasih.

Peruntukan RM20 juta untuk Projek Pembinaan dan Pemindahan 10+6 SJKC

2.39 ptg.

Datuk Seri Ir. Dr. Wee Ka Siong [Ayer Hitam]: Tuan Yang di-Pertua, pada 19 Ogos 2018, Yang Berhormat Menteri Pendidikan telah mengumumkan sebanyak RM20 juta untuk projek pembinaan dan perpindahan 10+6 buah SJKC, termasuk empat SJKC baru di Johor dan masing-masing sebuah di Selangor dan Pulau Pinang. Di samping itu, empat SJKC baru akan dikenal pasti kelak.

Dukacita dimaklumkan bahawa SJKC Kuek Ho Yao dan SJKC Sim Mow Yu yang telah melancarkan Majlis Pecah Tanah sebelum Pilihan Raya Umum ke-14 tidak dapat sebarang peruntukan sebaliknya peruntukan tersebut telah disalurkan kepada 10 buah SJKC yang tidak terkandung dalam senarai 10+6.

■1440

Apakah justifikasi yang diamalkan oleh Kementerian Pendidikan mengenai peruntukan RM20 juta tersebut? Kenapa pengumuman Yang Berhormat Menteri Pendidikan pada 19 Ogos 2018 ditolak terus oleh Timbalannya seperti yang dijawab di Dewan Negara pada 2 Mei 2019? Saya juga mengharapkan Kementerian Pendidikan dapat menyatakan sebab peruntukan tidak disalurkan untuk pembinaan SJKC Kuek Ho Yao dan SJKC Sim Mow Yu yang merupakan SJKC baru yang disahkan akan diteruskan pembinaannya oleh Yang Berhormat Menteri Pendidikan melalui kenyataan media pada 28 Jun 2018. Saya mohon Kementerian Pendidikan menyalurkan sekurang-kurangnya RM14 juta kepada kedua-dua sekolah baru yang dinyatakan di atas.

Selain itu, menurut Timbalan Menteri Pendidikan, Kementerian Pendidikan baru sahaja meluluskan sebuah sekolah baru dalam lingkungan 2 kilometer dari tapak SJKC Kuek Ho Yao iaitu di Eco Flora, kawasan Parlimen Tebrau, Johor. Apakah justifikasi yang diamalkan oleh Kementerian Pendidikan atas kelulusan tersebut dan adakah ianya bertujuan meminggirkan SJKC Kuek Ho Yao? Adakah SJKC yang bakal dibina merupakan sebuah SJKC kategori sekolah kurang murid yang akan dipindahkan dari Pahang ke Johor atau sebuah SJKC dengan permit baru?

Sebenarnya, kerajaan baru harus menyiapkan projek 10+6 dalam masa 5 tahun dengan peruntukan RM20 juta setiap tahun iaitu jumlah keseluruhannya RM100 juta seperti yang telah dijanjikan oleh kerajaan terdahulu. Kalau kerajaan Pakatan Harapan mahu membina lebih dari 10+6 buah SJKC, saya tetap mengalu-alukan tetapi projek 10+6 mestilah disempurnakan dahulu.

Semasa Timbalan Menteri Pendidikan diwawancara oleh akhbar *Oriental Daily* pada 13 Ogos 2019, telah menyatakan bahawa Kementerian Pendidikan akan memperuntukkan sebanyak RM20 juta pada tahun ini juga untuk pembinaan dan perpindahan SJKC. Sila senaraikan perincian peruntukan tersebut. Penyaluran dana secara konsisten untuk projek 10+6 adalah sangat penting supaya kesemua 16 buah SJKC dapat disiapkan dalam tempoh 5 tahun mulai 2018. Sekian, terima kasih.

2.42 ptg.

Timbalan Menteri Pendidikan [Puan Teo Nie Ching]: Tuan Yang di-Pertua dan terima kasih Ahli Yang Berhormat.

Tuan Yang di-Pertua, Kementerian Pendidikan Malaysia (KPM) mengucapkan terima kasih kepada Ahli Yang Berhormat Ayer Hitam terhadap keprihatinan beliau membangkitkan isu berkaitan Peruntukan RM20 Juta Untuk Projek Pembinaan dan Pemindahan 10 dan enam (6) SJKC dalam Kamar Khas pada kali ini.

Kementerian Pendidikan Malaysia (KPM) sentiasa memastikan mana-mana cadangan pembangunan sekolah yang telah dipersetujui oleh kerajaan dilaksanakan demi memenuhi keperluan rakyat. Walau bagaimanapun, pelaksanaan cadangan pembinaan dan perpindahan sekolah adalah tertakluk kepada syarat dan prosedur sedia ada.

Berhubung dakwaan Ahli Yang Berhormat Ayer Hitam mengenai peruntukan RM20 juta yang diumumkan oleh Yang Berhormat Menteri Pendidikan 19 Ogos 2018, KPM maklum bahawa dalam siaran media berkaitan ada dinyatakan bahawa di bawah inisiatif berkaitan SJKC, peruntukan sebanyak RM20 juta telah disediakan pada tahun 2018 dan juga dalam tahun ini untuk tujuan pembinaan dan perpindahan sekolah-sekolah SJKC. Namun, dakwaan Ahli Yang Berhormat Ayer Hitam bahawa pernyataan tersebut telah ditolak oleh Yang Berhormat Timbalan Menteri Pendidikan iaitu saya pada 2 Mei 2019 di Dewan Negara tidak dapat dikesan kerana berdasarkan semakan, Dewan Negara tidak bersidang pada tarikh tersebut.

Ingin ditegaskan bahawa KPM sentiasa komited dari semasa ke semasa dan sentiasa meneliti keperluan bagi pembinaan institusi pendidikan baharu termasuklah SJKC. Dalam hal pembinaan SJKC baharu, KPM melaksanakan analisis keperluan dari semasa ke semasa berdasarkan justifikasi bahawa:

- (i) enrolmen SJKC sedia ada tinggi dan mempunyai keperluan yang mendesak; dan
- (ii) tiada SJKC berhampiran dalam radius 5 hingga 10 kilometer untuk menampung keperluan penduduk Cina.

Berkaitan dakwaan bahawa KPM meminggirkan dua buah SJKC yang telah diumumkan, sekolah tersebut tidak mendapat kelulusan pembinaan walaupun majlis pecah tanah dilancarkan. KPM ingin menjelaskan berkaitan sekolah-sekolah berkenaan seperti berikut:

- (i) Meridian East, Bestari Perdana, Mukim Plentong, Johor - SJKC baharu ini ditangguhkan buat masa ini kerana terdapat SJKC Ladang Grisek yang terletak dalam jarak 2.1 km yang baru dipindahkan dari Bukit Gambir, Ledang dan bakal beroperasi di tahun 2020. Sekiranya projek SJKC tersebut diteruskan di tapak cadangan berkenaan, pembaziran berlaku kerana akan terdapat dua buah SJKC yang terletak dalam lingkungan radius yang sama. Maka analisis keperluan SJKC baharu di lokasi ini akan dikaji semula selepas SJKC Ladang Grisek beroperasi; dan
- (ii) Seri Austin, Mukim Tebrau, Johor - pembinaan SJKC baharu ini akan diteruskan di Mukim Tebrau. KPM telah menerima cadangan pembinaannya di tapak baharu yang terletak dalam lingkungan 2 km daripada tapak asal. KPM dimaklumkan bahawa terdapat pihak pemaju yang telah bersetuju untuk menyumbang pembinaan SJKC tersebut sebagai tanggungjawab sosial korporat (CSR).

Tuan Yang di-Pertua, berhubung status perpindahan bagi 6 buah SJKC yang telah diumumkan, untuk makluman Ahli Yang Berhormat Ayer Hitam, SJKC Poay Chai, Singkir, Kedah telah diberi kelulusan untuk berpindah ke Taman Bukit Indah, Johor. Walau bagaimanapun proses pembinaan sekolah ini sedang dalam peringkat pengesahan dan semakan lukisan teknikal daripada Bahagian Pembangunan, KPM sebelum diberikan kelulusan untuk melaksanakan pembinaan.

Bagi SJKC Panching, Kuantan, Pahang pula, pihak Lembaga Pengelola Sekolah (LPS) masih lagi sedang berusaha untuk mendapatkan tapak di lokasi baharu. Manakala SJKC Poi Min, Gopeng, Perak pula telah diberikan kelulusan pembinaan pada 9 Oktober 2019. Bagi SJKC Ladang Regent, Gemencheh, Negeri Sembilan yang akan berpindah ke Bandar Elmina, Selangor sedang dalam proses untuk mendapatkan kelulusan pembinaan.

Seterusnya, bagi SJKC Aik Hua Taiping, Perak, kelulusan telah diberikan untuk berpindah ke tapak baharu di Kota Seriemas, Negeri Sembilan pada 14 November 2017 tetapi pihak LPS

telah membuat permohonan untuk menangguhkan perpindahan tersebut. Manakala bagi SJKC Ladang Grisek, Bukit Gambir, Ledang, Johor pula, sekolah ini dalam proses memperoleh *certificate of completion and compliance* (CCC) daripada pihak berkuasa tempatan.

Untuk makluman Ahli Yang Berhormat, kesemua pembinaan bagi SJKC yang telah berpindah ini perlu memohon kelulusan untuk membina bangunan baharu di lokasi baharu berdasarkan prosedur sedia ada KPM. Ini bagi mengelakkan timbulnya sebarang masalah yang boleh menyebabkan sekolah tersebut tidak dapat dioperasikan serta KPM dikenakan tindakan undang-undang oleh mana-mana pihak akibat pembinaan terbengkalai atau bangunan tidak selamat untuk digunakan.

Kesimpulannya, Kementerian Pendidikan Malaysia sentiasa memastikan mana-mana cadangan pembangunan sekolah yang telah dipersetujui oleh kerajaan dilaksanakan demi memenuhi keperluan rakyat. Walau bagaimanapun hal pembinaan sekolah baharu adalah berdasarkan kepentingan nasional dan ini merupakan pendirian rasmi KPM. Sekian jawapan saya, terima kasih Tuan Yang di-Pertua.

Timbalan Yang di-Pertua [Dato' Mohd Rashid Hasnon]: Terima kasih Yang Berhormat Timbalan Menteri. Ahli-ahli Yang Berhormat, mesyuarat Kamar Khas hari ini ditangguhkan sehingga 2.30 petang pada hari Rabu, esok, 16 Oktober 2019.

[Kamar Khas ditangguhkan pada pukul 2.49 petang]